



Attaveqatigiinneq puigortunngornerlu

Inuttut inooqataanitsinni attaveqatigiinneq annertuvoq, avatangiisitsinnillu attaveqarsinnaaneq peqqissutut misiginitsinnut annertuumik pingaaruteqarluni. Attaveqatigiinnitsinni oqaatsit eqqaamasinnaanerlu sakkussat pingaaruteqarnerpaat ilagaat. Puigortunngornermik nappaatit amerlanersaanni oqaatsit eqqaamasinnaanerlu annikinnerusumik annertunerusumilluunniit sunnerneqartarmata, ajornartorsiutitaqanngitsumik attaveqarsinnaaneq annikillisarpoq.

Puigortunngorneq attaveqatigiinnermut ima unammilliisarpoq

Puigortunngornerup ajornakusuulersittarpaa:

- oqaatsit atorlugit oqaatiginissinnaaneq – pingaartumik taggisinik eqqaamasinnaaneq.
- Ilaquttat ikinngutillu aqqinik eqqaamasinnaaneq.
- oqaloqatigisap oqaasiinik paasinnissinnaaneq.
- oqaloqatigiissutigisamik eqqaamasinnaaneq
- oqaloqatiginniniarsinnaaneq.

Oqaatsinik atuinerup eqqaamasinnaassutillu allannguuteqarnerat, inoqatinik ataatsimooqateqarsinnaanermut unammilligassisinnaavoq. Puigortunngorsimagaanni arlaatigut kukkusinnaaneq kukkusumilluunniit oqarsinnaaneq annilaangagineqarsinnaamat, ataatsimooqateqarnissaq imal. ataatsimuualarnerni peqataanissaq merserineqarsinnaavoq.

Qujanartumilli oqaatsitigut piginnaasanut qanittumilu pisut eqqaamanissaannut ikorfartuutaasunik pitsaasunik periusissaqarpoq teknikkullu atortorissaaruteqarluni.

Attaveqatigiinnermut ikorfartuutissatut siunnersuutit pitsaasut

- qanoq ikiorneqarusunnerit pillug ilaquttatit oqaluutikkitt. Oqaatsit nassarinnissannut ikiorneqarusuppit imal. nammineq misileeqqaarusuppit?
- Puigortunngornermik nappaateqarnerit, taamaammallu eqqaamasinnaanikkut oqaatsitigullu unammilligassaqarnerit ammaffigjuk.
- oqaloqatigisavit paasiuminartumik kigaatsumillu oqalunnissaanik kissaateqarit.
- oqaatiginiakkannut ikorfartuutitut assit ilisarnaatilluunniit atukkit.
- oqaatiginiakkannut eqqaamassutissatut oqaatsit ataasiakkaat eqqaamaniutissat allakkit.
- isumaqatigiissutit allassinnaangorlugit allaffissaq ullorsiutilluunniit oqarasuaatip eqqaaniitikkitt.
- ullorsiutit ilaqtannit pulaartunilluunniit allaffigineqarsinnaangorlugit tamanit takuneqarsinnaasumut inissikkitt.

Kommunili puigortunngortunut ataqatigiissaarisooq, iluaqusersuutit allanik attaveqarniarninni iluaqutaasinnaasut pillugit oqaluttuussisinnaasooq, sukkulluunniit attavigisinnaavat.





Attaveqatigiinneq puigortunngornerlu

Ilaquttatit ima ikiuussinnaapput

Aappat, ilaquttatit ikinngutitillu, isumaqatigiissutigisassi suullu oqaloqatigiissutiginerisa eqqaamanissaannut ilinnik oqilisaasinnaapput.

Ilaquttavit ikinngutivillu tapersorsinnaavaatsit:

- soqutiginnikkut naalaarnikkullu.
- naammagittarlutik nassuiaanissannut piffisaliinikkut.
- eqqissimasumik, kigaatsumik, ersarissumik oqaaseqatigiillu naatsut atorlugit oqalunnikkut.
- oqaatiginiakkanni oqaatsit naniniarneranni ikiorteqarnissamik kissaateqarninnik eqqumaffiginnikkut.
- ilisimatitsissutinik pingaartunik allaffigisarnikkut.
- ilisimatitsissutinik apeqqutinillu uteqqiisarnikkut.
- ass. radio-ip imal. TV-ip qaminnerisigut avatangiisini nipiliornernik annikillisaanikkut.

